



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



China nunger Ladakh aser
Uttarakhand telungi aiter: Rahul



Brazil nung Tir Bolsonaro
anema longkak ait

VOL. XVIII NO. 352 (ADOK 353) DIMAPUR

TENTONÜ (MONDAY) MONGPUTENI (OCTOBER) 04, 2021

₹ 5.00

COVID-19 Nagaland: 17 dak putet & 37 taneptsü angu

Kohima, October 3, 2021 (TYO): Nagaland nung Deobarnü nisung 17 dak COVID-19 putet aser parnok züingsema nisung ajak agi 31,312 kümogo.

"Tesüiba ghonda 24 tsüingda nisung 17 dak COVID-19 putet. Parnokji Kohima nung 8, Dimapur nung 4 aser Longleng, Mokochung, Mon, Phek o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 37 taneptsü angu. Parnokji Dimapur nung 17, Kohima nung 14, Mokochung nung 3 aser Kiphire, Longleng o Wokha nung kaka (1) lir" ta paisa ashi.

Nisung 31,312 rongnungi 29,314 taneptsü nguogo aser ibaji 93.61% lir, ta Dr Kikon-isa

shisem.

Tang nisung 329 anepaludar aser parnok rongnungi nisung 240 dakbo shirangba yimya kecha mali, ta paisa shisem.

"Honibar tashi nung nisung 690,144 nem COVID-19 vaccine indang dose 10,65,962 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,939, healthcare workers 15,996, arishi küm 45 ser temapur 198,554 aser arishi küm 18 nungi 44 tsüingda alir 414,655 lir, ta paisa ashi.

Vaccine agirtem rongnungi nisung 375,818-i dose anaprong agiogo. Parnokji frontline workers 47,326, healthcare workers 13,265, arishi küm 45 ser temapur 139,399 aser arishi küm 18 nungi 44 tsüingda alir 175,828 lir, ta Dr Thurr-isa ashi.

Dimapur nung Core Committee-i Oct 5 nü Public Rally ayonger

Dimapur, October 3, 2021 (TYO): Dimapur Deputy Commissioner's Office belena meyoktsü atema tentetba Core Committee-i October 5, 2021 nü Public Rally ka ayonga agitsü.

October 4, 2021 tashi nung Nagaland sorkar nungi telangzüba kecha melira Mongulbar anepdang 9:00 ako nungi sentong agitsü, ta Media Cell, Core Committee, Civil Society Organisations (CSOs) Dimapur sangdong ka nung metetdaksü.

Public Rally ji City Tower junction nungi DC office tashi agitsü, ta parnokisa ashi.

Iba sentong asoshi Dimapur nung Tribal Unions/non tribal Communities ajak renema alitsü aser pei pei sobaliba sübotsütem agir shilem agitsü mepishir, ta Core Committee-i metetdaksüogo.

Parnokisa Dimapur Urban Chairman Council Federation (DUCCF) dang pei colony council aser nübertem renema atadaksütsü mepishia metetdaksüogo.

Dimapur nung tangatetba shitak aliba senso ajaki asenok ajungtsü mechi iba sentong nung yariteptsü ayongzüker, ta Media Cell sangdong nungsa shia lir.

Oct 5 nü UDA senden amentsü

Dimapur, October 3, 2021 (TYO): October 5, 2021 nü United Democratic Alliance (UDA) senden ka amentsü.

Sendenji anepdang 11:00 ako nung Chief Minister's Residential

Complex, Kohima nung amentsü.

Iba senden UDA nung adenba teloktem- NDPP, BJP aser NPF nungi züingsem terer (10) aser Independent MLA tem adentsü jaokogo.

Manipur nung SOREPA ta ser telungpur teloktasen ka tenteter

Guwahati, October 3, 2021 (Agencies): Manipur nung ozüingi noktanga aliba telungpur telok- Kanglei Yawol Kanna Lup (KYKL) nungi züingsem kari ano telungpur teloktasen ka tentetogo.

"Iba telok ya Socialist Revolutionary Party (SOREPA) lir aser onoki Kangleipak/Manipur in Western South East Asia (WESEA) nüjiso angutsü atema tentet" ta taoba KYKL vice president aser SOREPA tanishir Toijam Ibochou-i ashi.

"Onoki Kanglei/Manipuri Nationalism nung amendaker inyaksangshir, saka nüjiso angutsü atema tetsü lima meimba agi dangbo meperir" ta pai ashi.

"Inyakyim shitak nung mapa inyaksüla aser iba atema onoki Socialist Revolutionary Party

(SOREPA), Kangleipak ta ser teloktasen ka tentetogo. Taoba KYKL züingsemtemi iba telok tentet" ta Toijam Ibochou-i sangdong ka nung ashi.

Kanglei/Manipuri nung maittsü wazüka yua, "Marxism-Leninism-Maoism" tangatetba nung linük nüjiso atema inyaksüla ta nisungtemi amadokogo, ta Ibochou-isa ashi.

"Sen aser tashi ajanga nüjiso atema inyakba mapa khen atema azüoktsü akok saka teti atemabo mazioktetsü" ta paisa shisem.

"Onoki KYKL akhümtsübur saka tangatetba balala asubayong parnok den tesentakpet pilar. KYKL ajanga onok dang nüjiso atema inyakba mapa sayuba atema pelar" ta Ibochou-isa metetdaksü.

ADC Shamator-i By-Election atema tetuyubatem agütsür

Dimapur, October 3, 2021 (TYO): Tuensang district kübok 58 Shamator-Chessore Assembly Constituency By-Election atema Additional Deputy Commissioner & Returning Officer B. Henok Buchem-i Block Level Officers (BLOs) nem tetuyuba kar agütsüogo.

BLO temi pei pei Polling Station telongtet nung teintet rogotem (arishi küm 80 ser temapur), matamabensartem aser Covid-19 alitsü akok ta temolung malemertem mesüra shirangertem ki sema aotsü aser Form 12D agütsütsü metetdaksür, ta Henok Buchem-i ashi.

BLO temi vote enoktsürtem dang nungi Form 12D indang acknowledge meshiba sülen October 6, 2021 nung mesüra iba anogo matongdang Returning

Officer indang office nung agütsütsüla ta paisa metetdaksü.

ADC aser Returning Officer Buchem-isa Shamator Sub Division kübok prangpong yua alirtem dang October 8, 2021 matongdang pei anasatiba Police Station nung prangpong agütsütsü atema tetuyuba agütsüogo.

Tashi mangartem indang license agientsü, license noktangtsü mesüra ozüing tapet kübok license kibur merenshitsu ta Buchem-isa metetdaksü.

Paisa Shamator Sub-Division kübok Departmental/Police officers, Police personnel aser staff ajak October 5, 2021 matongdang pei mapa inyakdaki arutsü atema tetuyuba agütsüogo.

Shamator nung department indang Officer in-charge temi

anogoshia Additional Deputy Commissioner dang pei pei department indang attendance agütsütsü aser iba tetuyuba sülen manidakertem Election Laws nung aliba ama merenshitsu, ta ADC & RO-isa metetdaksüogo.

58 Shamator-Chessore AC By-Election atema ADC & Returning Officer-i mapa lemzüksüba:

- (1) Security arrangement inside ADC office : OC, Police Station Shamator,
- (2) Accommodation : SDO PWD (NH) Shamator
- (3) Water and Sanitation : SDO (PHED) Shamator
- (4) Maintenance of Road: SDO PWD(R&B) Shamator
- (5) Electricity: JE (Power) Shamator
- (6) Videography / PA system: IA, IPR Shamator
- (7) Transportation : SDO (Soil) Shamator

Uttar Pradesh nung aluyimer 4 dena nisung 8 asü



Uttar Pradesh kübok Lakhimpur Kheri nung lungkak aitba aluyimertemi Union minister meinba gari ka rongdoktsüba noksa nung angur. (Lakhimpur Kheri, October 3)

maliba aser democracy anema inyakba jungkai adoka sayur. Sorkari aluyimertemi inyakba mapa tashiyim amshia anentsütsü meranger. Ibaji tanü sorkar aser sorkar yimsüsürtem sayuogo" ta Bharatiya Kisan Union (BKU) lennir Rakesh Tikait-ia ashi.

"Asenoki Mughal aser Firangi nung tsüingdang asen temetentem atema mapudak aser ibaji sorkar amadokogo. Sorkari aluyimertem ojang dang tendangtsüla. Aluyimer asütsü akok saka iba nung onoki temolung ila mebilemer" ta BKU lennirisa metetdaksü.

Lakhimpur Kheri kübok Tikunia nung Deobarnü aluyimertemi Centre-i yangluba Farm Law 3 anema lungkak ait. Lungkak aitba tesemi UP Deputy CM Keshav Prasad Maurya aruba liasü aser iba jagi aluyimertemi pa dang wako tanak sayutsü sentong renemer liasü.

"Deputy CM manenzükdaksütsü atema aluyimer meyrjang aikati tanep Maharaja Agrasen Ground nung helipad nung adenshia liasü. Tawa tu Union Minister of State for Home Affairs Ajay Mishra Teni-i lokti sentong ka nung aluyimertem amokmerena liasü. Tanü aluyimertem lungkak aitba tesem nungi senshidang lendongji atalok" ta SKM-i metetdaksü.

"Aluyimer kabo Union MoS Ajay Mishra Teni'er jabaso Ashish (Monu) Mishra-i khaset ta osang angazüker. Iba lendong nung ano aluyimer ana tepset aser 10 shi kanga mejungi yirua lir" ta parnokisa ashi.

Iba ajanga aluyimertem jashidaksü aser parnoki BJP lennir indang garitem raksatsü, ta SKM-isa ashi.

New Delhi, October 3, 2021 (Agencies): Union Minister of State for home Ajay Mishra aser Deputy Chief Minister Keshav Maurya nati Uttar Pradesh kübok Lakhimpur Kheri nung aluyimertemi lungkak aitba tesem sendangba mapang lendong atalok.

"Iba lendong nung aluyimer pezü dena nisung 8 tashi asü" ta Additional Superintendent of Police, Lakhimpur Kheri, Arun Kumar Singh-i ashi.

Union minister indang convoy nungi gari kati aluyimer ana menüngset ta aluyimer teloktemi ashir.

Iba lendong nung tangar pezü asübaji aluyimer menüngba gari nung mena alirtem liasü, ta Additional Superintendent of Police-isa ashi.

Lakhimpur Kheri nung aluyimertem amakba aija Samyukta Kisan Morcha (SKM)-i Union Minister of State (MoS) for Home Ajay Mishra'er jabaso Ashish Mishra aser tangartem merenshitsu takhangba

agütsüogo. SKM-isa Ajay Mishra mapa nungi anentsütsü takhangba agütsür.

Deobarnü Lakhimpur Kheri nung Ajay Mishra-i pa indang gari agi lungkak aitba aluyimertem dak menüng aser iba lendong nung aluyimer pezü asü aser aika yiru ta SKM-i ashi.

Centre-i Farm Law 3 yangluba anema Samyukta Kisan Morcha (SKM)-i lungkak aiter. SKM nung farmer unions 40 tema dena lir.

Deobarnü atalokba ya Supreme Court nung tang teinyakdak obendanger ka ajanga bushisüingdang südakjang ta SKM-i takhangba agütsüogo.

Tanü iba lendong atalokba atema aluyimertemi Hombarnü lungkak aittsü ayongzüker. Parnoki linük kübok magistrate office kima nung asüingnep 10:00 ako nungi nikongdang 1:00 ako tashi lungkak aittsü.

"Lakhimpur Kheri nung lendong atalokba atema jashir. Iba ajanga sorkar dak taochi

Kohima nung GPDP campaign tenzükogo



Kohima, Mongputeni/Oct. 03 (TYO): Mahatma Gandhi asoba anogomung den külemi Department of Rural Development ajanga October 2, 2021 nü People's Plan Campaign on Gram Panchayat Development Plan (GPDP) sentong ka RD Conference Hall, Kohima nung tenzükua liasü.

Iba anogo nungsa Commissioner and Secretary, RD, Neposo Theluo ajanga waste disposal vehicles (Kohima Sadar Phase III) trok tashi flagged off sütsü, koba SPMRM ajanga alitsüba alitsü.

Iba sentong nung Commissioner & Secretary, Neposo Theluo-i ashiba agi, Mahatma Gandhi asoba anogo nung iba campaign tenzüküsü ya tapet lir, kechiaser paia yimtsüng nung tentet aser gram panchayat nem tashi tali agütsüsüla ta amanga liasü.

Scheme balala takok ngua

inyaktsü atema department ajanga lungjemtsüla aser department ka kisüng azüngmeyaka meinyaktsüla. Taküm nungbo sendaktepa aliba department nungia amalitep tali tajungba akatsü teimla lir aser yimtsüngtem nunga mapang tatemi inyaktsü ataa malitsüla, ta pai ashi.

Taküm atema yimtsüngtemi terenlok sentong tajung yanglutsü imlar, koba ministry ajanga pelashishia agizüktsü, ta pai ashi.

Director, RD, Liboni Humtsoe-ia October 2 ya kangadang tongtipang anogo ka lir, ta ashi aser asen nükjidong tongtetsü atema GPDP renemtsü asoshi People's Plan Campaign ya sabang tajung ka asütsü imlar, ta ashi.

Laisa ashiba agi, SPMRM kübok department ajanga Kohima Village kübok khel pezü atema mürekmejutsü gari

pezü alitet aser ano Chedema aser Chedema Model Village nung shishilempatsü atema gari ana alitet.

Item gari trok bendenlokba ajanga libajen temerükba akumtsü aser alu nung züsenteba chiyongtsütem shishilempaba tesemi temelaba nung belener otetsü aser yimtsüng nung rongsenketzüng jenjang ajungkettsü, ta lai teimla lemsatöp.

Waste Disposal Vehicles agütsüba atema Kohima Village, Chedema aser Chedema Model Village tenüng nung Chairman, Kohima Village Council, Hielievio Solo ajanga department dang pelaba lemsatöpa liasü.

Iba sentong nung GPDP indang sentongtem RDO, Vilopi Sakhrie ajanga PowerPoint agüja liasü.

Iba sentong nung BDO, Kohima, Celine Thol-i melepzüng o jembia liasü.

Medziphema nung Gram Sabha aser Samved senden amen

Dimapur, Mongputeni/Oct. 03 (TYO): Mahatma Gandhi asoba anogo nung DWSM PHED Dimapur ajanga ISA (Act of Kindness) den lungiemer Watsan Committees on Jal Jeevan Mission den Nationwide Gram Sabha aser Samved senden ka Medziphema Village Council Hall nung mena liasü.

Iba sentong nung tetushi tesemdanger PHED, Secretary, Kesonyu Yhome ajanga yimdaklir dang Jal Jeevan Mission Scheme maangka anguba indang lemsatöpa liasü.

Medziphema Village ya Dimapur district kübok yimtsüng tulutuba rongnung ka lir, anungji Jal Jeevan Mission ya lemzük, anungji kidanger yimtsüngtem dang tatishitsü

tajung sayua sorkari agütsüba teyari ya tajungtiba nung amshitsüla, ta pai ashi.

Yhome-isa Jal Jeevan Mission indang nükjidong rateta ashi aser Swachh Bharat Mission Gramin indang inyakyim rateta shia liasü.

Yimtsüng nung kibong shia nem tajemtsü tzü tajung peria agütsüsü nükla nung tenzükba Jal Jeevan Mission indang pai yimdaklir nem angatetdakja liasü.

Sentong nung Chief Engineer, Sanitation and WSSO, PHED, Er. Tsathrichem Sangtam-i jembiba mapang yimdaklir dang yimtsüng aser tajemtsü tzü müreka ayutsü ayongzük aser mürekmejutsü ya nisung ajak teinyaktsü lir, ta ashi.

Nagaland nung aliba yimtsüng 1400 rongnung Nationwide Gram Sabha aser Samvad Jal Jeevan Mission aliba ajanga Medziphema Village ya tia taka yimtsüng ka akumer, ta pai ashi.

Medziphema Village Chairman, Metsilhoukho-ia iba sentong nung o tatsüka jembiba mapang yimdakliri tzü timtem ajangshiba indang lemsatöpa liasü.

District Co-ordinator DWSM, PHED (R) Dimapur, Imojungla Longkumer ajanga Gram Sabha onüktem lemsatöpa liasü.

Iba sentong nung Er. I Chirang Zeliang, SDO, PHED, Medziphema menden liasü aser EE, PHED (R) Er. Vikeduolie ajanga tarur pela agizükba o jembia liasü.



Medical Oxygen For All nungi Mon district nem October 1, 2021 nü Customised 4x4 Ambulance ka agüja liasü. Medical Oxygen For All ya India nungner alima tesem balala nungi kumtetba lir. Parnoki alima tesem balala nungi medical grade oxygen cylinders, canisters, koncentratör aser generators amala bendena alimai junga memetetü aliba district/yimti nem teyari agütsür. Iba Ambulance amoktsüba sentong ya Deputy Commissioner, Mon indang Conference Hall nung agia liasü, kong Medical Oxygen For All nungi züngsemtem, Deputy Commissioner, Mon, Thavaseelan K, IAS den district ketdangsürtem dena liasü.

Dimapur nung mejangjaba nisung tasü mang ka nguteta lir

Dimapur, Mongputeni/Oct. 03 (TYO): Dimapur-Rangapahar End tsütsü KM 258/6-7 nung train lenmang tezülen October 2, 2021 nü mejangjaba tebur arishi küm 30-35 shi ka tasü mang ngutet, ta sangdong ka ajanga ashi.


Ozüng agi melaba maparen ajak inyakba sülen nisung tasü mang ya PM examination aser jangjatetsü atema District

Hospital Dimapur Morgue nung bener oa lir.

Iba nisungba ya sentsü tanak aser tanen T-Shirt aser Track Pant sentsü tanak ka agir liasü.

Kibur/kinunger/tembartemi Officer-in-Charge, GRPS, Dimapur den Mobile number 708505502 ajanga tongteprateptsü metetdaksür, ta sangdong ajanga ashi.

Minister Kronu-i New Delhi nung International Coffee buyers ajuru



Minister Neiba Kronu den Dr. Pieter Vermeulen aser Carl Wessel, Deluxe Coffeeworks Co-Founder nungertem New Delhi nung tangokba noksa ka yangi angur

Dimapur, Mongputeni/Oct. 03 (TYO): Nagaland nung coffee adokba tali tajungba metetsü asoshi International Coffee buyers tem state bushia aruba mapang New Delhi nung Minister, Planning & Co-ordination, Land Revenue and Parliamentary Affairs, Neiba Kronu ajuru liasü.

Carl Wessel, Deluxe Coffeeworks Co-Founder ya alima nung coffee aliba company tulutuba rongnung ka lir aser yamaji linük balala nung kongsang Rashia lir.

Minister den sensaksemba mapang Carl Wessel aser Dr. Pieter Vermeulen nati coffee alitsü tejangraba aliba indang lemsatöp aser jenjang tajung agi alizüktsü, ta ashi.

Iba mapang Minister Kronu-ia Nagaland indang nükla lemsatöp aser Nagaland nung iba ama rongsen ya shingia mokongshi aser alima den tokteptsüa Nagaland nung jenjang lir, ta ashi.

Paisa "Trees for Wealth" nükla indang lemsatöp aser state nung aluyimer rongsenketzüng ajungketba nung coffee ya tongtipang shilem alitsü, ta ashi.

Kronu-i Honey (ninang mojitzü) aser Local Ginger (süngmok) indanga lemsatöp, koba kanga ajema nguaka jenjang aketba chiyongtsü lir, kechiaser temang atema tajung lir aser dangartemi Nagaland nungi item ya alizükba bener aotsü bushir, ta ashi.

NSCN/GPRN (R) ajanga Yemshe & Tsokum benjong salem lemsatöp

Dimapur, Mongputeni/Oct. 03 (TYO): NSCN/GPRN (Reformation) ajanga Pochury aser Khamniungan nungner den 'Yemshe aser Tsokum' benjong salem lemsatöpa liasü, koba October ita mezüng hopta nung amunger.

Yemshe ya Pochury kin-i alu arutsü mapang amongba benjong ka lir, aser iba mapang alu nung junga arutsü atema Tsüngrem dang temoatsü meshia benjong ya amunger, ta NSCN/GPRN (Reformation) indang MIP (Ministry of Information & Publicity) sangdong ajanga ashi.

Tsokum ya Khamniungan kin-i alu arutsü mapang amongba benjong ka lir aser parnoki alu junga arutsü asoshi Tsüngrem temoatsü jazüka iba benjong ya anogo tenet tashi amunger. Iba mapang parnoki ken atener, tsüngsanger aser danga maparen balala inyaker aser lenmangtem yanglushia amunger.

Iba benjongmung ajanga Pochury aser Khamniungan nungner adianu aser adianutsürtem mulamushia moatsütsü NSCN (R) tamang lir, ta sangdong ajangasa ashi.

Guwahati nung Tatong Tir Naidu-i Heritage Centre semzüksü



Deobarnü India Tatong Tir Venkaiah Naidu-i Panbazar, Guwahati nung Mahabahu Brahmaputra River Heritage Centre lapoktsüdang agiba noksa angur.

Guwahati, October 03, 2021 (Agencies): Deobarnü India Tatong Tir Venkaiah Naidu-i Panbazar, Guwahati nung Mahabahu Brahmaputra River Heritage Centre semzüksüo. Iba heritage-cum-cultural centre ya Guwahati kübok old DC Bungalow nung yangluogo. Guwahati nung heritage centre tasenba ya Assam indang sobaliba indang osettsüset sayuba tesem ka kümogo.

Panbazar, Guwahati nung Mahabahu Brahmaputra River Heritage Centre semzüksüo. Iba centre ya asen (Assam) kin indang akhi tetsü tebou temi amshiba osettsüset tejentem sayuba tesem ka asütsü," ta Assam chief minister Himanta Biswa Sarma-i ashi. Kasa anogo Naidu-isa Gauhati Medical College Hospital (GMCH) kübok state cancer institute nung PET-MRI wing lapokja liasü.

wing tasen, koba Northeast nung mezüing asütsü, iba wing ya sen cr 62 indoka yangluogo. "Cancer patient tem mapang shitak nung aser tajungtiba anepalutsü atema Tata Trusts den longjemer State nung GoA-i Distributed Cancer Care Model amenoker. Temaba jenjang nung cancer tashidak anepalutsü aser jenjang dalang agi iba tashidak anepalutsü nukjidong nung iba centre lapoker asütsü," ta CM Himanta Biswa Sarma-i ashi.

Gari tanidak nung mi adoka tanisang rongset



Shillong, October 03, 2021 (Agencies): Kanga dang taoksatsü lendong ka nung, Honibarnü arishi küm 37 tain assistant professor ka Shillong nungi Tura tashi aoba mapang pai aniba gari nung mi adokba sülen, pa iba mi lendong nung

taküm dang rongsetta liasü. Assistant professor, shiba Ferdinand B Lyngdoh ta jangjatetogo, pa ya taoba Meghalaya Chief Minister asür E K Mawlong'er jabaso tanubusang aser Congress MLA George Lyngdoh indang

teno (brother) liasü. Sangdong ajanga angazükba agi, Umden yimtsüing nung, Lyngdoh mener oya aliba Bolero gari nung aoksa/ajungbena dang mi adoka liasü. Bushisüngdangba osang ajanga angazükba agi, iba gari indang air conditioner nung technical short circuit ka mesüra totzü senzüba/aoba pipe nung totzü senzüka aoba ajanga gari nung kara kara mi prokshia professor taküm agi asütsü akok. Lyngdoh ya Sangsanggre, Tura kübok College of Community Science nung Department of Basic Science and Humanities indang Assistant Professor in charge liasü.



Jaintia Hills nung aliba Lakroh Micro Hydroelectric Project complex nung Dapmon Pohtam aser Eddy Kery Pohtam nati leopard techanu ka kümzükba sülen agiba noksa angur. Honibarnü tenati Range officer, Jowai Eddy Kery Pohtam ket nung leopard techanuji agütsüo.

Sikkim Sorkari 'packaged drinking water' nokdangtsü

Gangtok, October 03, 2021 (Agencies): Sikkim sorkari state nung packaged mineral drinking water lemshiba aser ayokba nokdangtsü terenemba lir. Honibarnü Gangtok nung Sikkim chief minister PS Tamang-i iba mera agitsü osang sangdonga liasü. Iba Himalayan State (Sikkim) nung sangküm January 1 nungi packaged mineral drinking water ayokba nokdangtsü. Sikkim chief minister-i ashiba agi, State nung tzü temerük adokdak/tzöpokdak tajung moaja lir, ajiasünung pungdang nung zür aliba mineral

water amshitsü/ayoktsü nüingdak madoker. "Sikkim nung tzü temerük adokdak tajung moaja lir, iba yongji State nung mineral water bottle amshitsü menüingdaker," ta CM PS Tamang-i ashi. "Sikkim kübok libajen nung moaja aliba nungi nüingdakba tzü peri agitettsü akok," ta pai shisem. Honibarnü, Gangtok nung Gandhi Jayanti anogomung sentong agiba mapang, Sikkim CM PS Tamang-i iba osang sangokja liasü. Iba mera ya magidang, Sikkim kübok raliwalirtemi semdangba tesem kar nungbo plastic water bottle nokdanga lir.

Guwahati nung Thelamara circle officer apu

Guwahati, October 3, 2021 (Agencies): Sonitpur district kübok Thelamara Circle officer Barenya Ranjan Barthakur puogo. Barthakur-i ochimashi mapa inyak ta tai tonglokja Guwahati nung vigilance & anti-corruption department-i apu. Barenya Ranjan Barthakur-i Lat Mandal dang ali ayokertem

dang nungi sen meshitsü atema tetuyuba agütsü ta tai tonglokja lir. Ketdangsurtemisa Lal Mandal puogo aser pa ya Thelamara Revenue Circle nungi Gulzar Hussain ta jangjaogo. Gulzar Hussain ya September 27 nü Guwahati nung nisung ka ket nungi süpokrem meshia agidang apu.

MLA Sherman Ali anogo ananü police ket nung ayutsü



Guwahati, October 3, 2021 (Agencies): Assam nung Panbazar Police-i Dispur Police den yaritepa MLA Baghor MLA Sherman Ali-i lokti nung telemsa adoktsüsa olen jembiba atema Honibarnü police-i apu aser pa anogo ananü police ket nung ayutsü. Police-i parnok ket nung pa anogo 10 ayutsü atema asüingdang saka okadaki anogo ananü ayutsü temelega agütsü. Sherman Ali ya diabetes aser cardiology ajanga timtemer anungji pa medical treatment atema maparen renemtsüla ta pa atema lawyer-i okadaki mepishiogo. Panbazar police station nung Sherman Ali anema Indian Penal Code kübok FIR ka benoka lir. Tanabuba nung Dispur police station nunga IPC kübok pa anema ken o ka benoka lir aser tasembuba nung Geetanagar police station nung ken o ka benokogo. Honibar nikongdang 6:15 meta pa MLA hostel nungi apu.

Panbazar Police-i Dispur Police den yaritepa MLA Sherman Ali apu. Sherman Ali ya taoba mapang All India United Democratic Front (AIUDF) nungi MLA ka liasü aser pai Assam lungkak aitba mapang taküm bendanga agütsürtem mezüingmeshia jembia. 1983 küm Assam agitation mapang Darrang district nung nisung 8 tepset aser parnok dang taküm bendanga agütsürtem ta ajar saka Ali-ibo parnok dang nisung tepsetertem ta jaloktsü. "Nisung tepseter kodanga metushitsü. Parnok aitsütsü. Nellie nung nisung tepsettsü atema aoertemjia nisung tepsetertem lir saka parnok dang taküm bendanga agütsürtem ta shia sen lakh 5 agütsü" ta paisa metetdaksü. Iba olen jembiba atema Assam nung nisung aser lokti aikati Ali aptsü atema takhangba agüja liasü.



TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI(OCTOBER) 04, 2021

Nagaland totzü

Nagaland nung alima nung alir nübortem ajak nüngdakba süng, long, tzü, mijang aser totzü ajak lir saka asenoki tanü tashi itemji asenok tajangzük agitettsüsa tangar nem magütsütetter. Iba jagi asenok sensaker. Ibaji ki sünga jangotsü bendena yur surochioka mechiyongtet yaseta kazür amai lir. Nagaland nung akaba rongsentem rongnung tangsa agiteta molur ayoktsü akokba rongsenji ali telong nung atsüngdena akaba gari totzü ya lir. Atangji, iba totzü ya Nagaland nung tang tashi bushiteta akaba tesemji Lotha lima Changpang nunger lushi nung lir. Iba lushi nung 1981 küm nungi ONGC purtemi ali telong nung totzü bushiba mapa tenzük aser parnoki iba mapang nungji totzü metric tonnes 1.02 million atsütet aser iba tsüda Nagaland government nem alimelen sen crore 33 agütsüba otsü lir. Iba amaji Nagaland nung gari totzü bushia atsütet tenzükba mapang ka nung, tia junger majungka, Naga nunger linük tenzükertemi Naga lima nung totzü atsütetba mapa inyaktsubaji nokdang, anungji ONGC purtema totzü atsüba osettsüset amenoka akabatem jungjunga telokdena melokden aser teshibanga meshibang, mashi mashi ka yutsür, parnok mapa inyakba tesemji 1994 küm yutsür oa adok. Iba jagi parnok aoba sullen, ali telong nungi totzüji jateta adoka temeket alumang ajak menena totzü tazü ayimba osang asenok karibo angashir alitsü. Iba anemaji Lotha nungertemi okadak ken o agütsüba agi okadak nungi obendangertemi ONGC purtem dang totzü jajeta adoka temeket tesem menendaktsüba ajakji merüktetsü obendanga agüja liasü. Atangji, tangbo Nagaland tatar senden nung latetba ozüng, " Nagaland Petroleum and Natural Gas Rules 2012," lir. Iba ozüng nung lateta aliba agi, Nagaland nung koba teloki totzü tudir tuaka, totzü agitetertem jagi alimelen 16% dak tajemba magütsütsü aser alimelen 16 % nung jagi government dangi 8% aotsü, ali kibur nem 2% agütsütsü, iba yimsüng nem 4% agütsütsü aser District Planning Board nem 2% agütsütsü ta latetja lir. Iba ozüng nung ajemdaker, Nagaland government-i totzü bushia atsütetter telok ka nem totzü bushia atsütettsüba mapaji agütsü saka iba mapajia Gauhati High Court-i anenja lir, kechiyong ali telong akaba rongsen totzü amajibo agiteta amshitsübaji "Union list" nung alinungji, state government dak masü saka Center government dak dang tashi lir ta metedakja lir. Iba jagi, India temzüng nung Nagaland asoshi yimten tashi aser maongka balaka agütsüba arla 371 A nung shia aliba tashi agizüka ayu ama akümer. Ano, ibaji dang masü saka ali kiburtemia tang lateta akaba ozüng nungji temulung masür, kechiyong ali kiburji government masü saka yimtaklirtem li lir, anungji totzü bushia agitetba telok den tangatettep yangluba nung, state government masü, ali kiburtemjiang kibur ama adentsüla ta akanger. Iba denji ano asenok agitsüba alimelen nung jagi District Administration (District Planning Board) nem masü saka kin telongjem nemanga agütsütsü tim ta Lotha Hoho-i takangba agüja lir. Aji oda, linük tenzükertem nungi tenzükali kiburtem, kin telongjem aser center government-i dena nokdangba agi, tang tashi Nagaland nung akaba totzü agiteta meyokteter. Tangbo, joko ali telong nung rema akaba rongsentem bushia agitettsüba mapaji state list nung masü saka Union list nung lir ta center government-i aridakba jagi balaka, Nagaland nung totzü bushia agitettsübaji mapa tasak kümogo. Atangji, India temzüng arla 371A nung ali tema aser telong dak aketba rongsen ajakji Naga nunger ali kiburtem meyong ta shia lir, ibaji Naga nungertemi kokteta jembitetsüla aser ali kiburji govt masü saka shitakba ali kibur yimtaklirtemji sädaktsür, Nagaland takar akümstsü asoshi ali telong aser tema nung rongsen bushiba mapatem yabo ajungshiteptsüba dak alaka menokdangtsüla.

OLEMSABANG

Tanü lokti temelenshi bener aruba nung pei-lokti jenjang repringdangba
(Introspection in bringing about a social change today)

- S. Temjen Imchen, Jorhat, Assam

(Yashi adok nungi...)

Temalen agüja aliba onuktem jembidang, teti nung lanur tesayur aser tenzükertem yagi shilem agir aser shisatsü agutsutepa dang aoer. Lanuyim tesayur aser laiputishirtemji tashi temetet tajung nguteter alir aser tekaraburtem asünung, jet-jet ta dang (fast-thinking) onük ajakji angateta aoer, jembir aser lenji oa dang sensaksem akar. Tasa (idea) kar bo tejen, karbo tasen benoka jembir. Discussion mapang nung lanurtem tsüngda obang-mapu kodanga madoker. Give-and-take yimya nung aoer. Ibaji yimya ji kanga tajung! Iba den külemi, tejembiba onükji osangkaket (Newspaper) adokdakja aser social media balala nung prokshia ano tangar a züngdaktsur. Iba osang prokshiba ajanga, asen Aor lokti, Ao Senden mesüra ABAM sabang tashi temelenshi indang jembia metepelateper. Intellectual telok ka - through any social media platform - nung kechi lemsateper iba indang metetpela-tepbajia mapa tajung aser terenlok mapa!

Tainbor teloki o-lemsapang nung lokti temelenshi atema shilem agiba:

Social media platform (for e.g., WhatsApp) nung tainbor telok (senior folks) koba nung züngsem ainaka tena shilem agir, ibajia lokti temelenshi asoshi lir. Lokti nung takutsüngsen bener arutsü inyakba nung shilem agirtemji nisung kar secular teachers, bangdak yimsusur, laishirtem, arogo nung tenzükali, journalist nubo tajung kar atenba, aser mapa nungi sodi (retired) agir alirtem jenti tena lir. Ni iba o lemsatepba ya group discussion koba social media sabang nung agir ibaji analytical approach tsütsü nungi angatetsü merangdi. Tejembiba onük ajak nung item tainbor-i shisa tarok aser tajung agütsüyonga aoer, ibaji junger. Saka, parnok dak timtim kaji: jembiba dak alaka melenshitsü tasak!!! Temalen agüja aliba onük tajungtem ajak lockdown mapang nung anogo munga züngsem ainakati shilem agia lemsateper. Lanu-asensor memesuk, tainbor telok timba kati sabang nung anogo, hapta junga, aser ita piyong onük tajung aika jembia aruaka, teloki kodang kechi inyaktsula (to suggest proposals) ta asüandang, parnok ishinakati practical nung nungbo meinyaktetsü ta shia noktanga (suppress) ayur! Hau, atangji print media ajanga zülur aser osang kaket nung adoktsur aser azünger. Ibaji tatem asür. Tangatetsu kaji ya: sabang nung jembidang teintet-rogotemi opang mapurjia adoker, ibaji shisatokden yimya. Saka, sensaksem telok nung tajiteta kaji ya - züngsem karibo lanu-asensor shisashirtemi ashiba o-jang kata mepaidoki dang langzur; pei metetbaji dang absolute truth; kum noklang ka tain lokti aser arogo tamang aser inyakyim ji dang noklang nung noklang shitak ta bilemer aser shioktsur; temetongshi o magizuker; aser item amala aika lir. Temelenshi indangbo jembir, saka asen taküm yimya aser lokti nung temelenshi atemabo meinyaktsu ta bilemba angur. Iba ama jakla aser mulungsentsu yabo melenshitsüla. Ano timtim kaji, tainbori tanubortemi ashiba o magizukteter; tejakleni oya alirtemji sottsu meranger, mesüra tenuk meremer; akumtsubutep mali. Ken-kenbo, ajia adar tayang kübzükteper. Aya, yamai süra asenok koma alima dangi lokti nung takutsüngsen (social rejuvenation) bener arutsütsü ta bilemer! Ajak masü, nisung kar lir! Alima yanglushinüra, tangar o-a angatsüla tim; alima yanglushinüra, temetongshi o agizüktsüla. Iba o zulu ya group discussion koba agir ibaji analytical approach tsütsü nungi angatetsü merangogo.

Temalen lemsatepba onük nung ajemdaker, kü o-mulung ishika idaki lephsia agütsür. Lokti temelenshi bener arutsü merangba nung shilem agir ajak: teintetbor aser lanur-asensor shilem agitetsü lenmang aisu nung langur. Lokti temelenshi ka mesüra mapa tasen ka inyaktu merangba nung ajak longjemmer aotsüla! Iba nungji tarishitep agi masü teyimlatep, tesempatep masü tazüzükteper, telemsatep masü telongjem, tekirak mulungsentsü masü ochi mulungsentsu, asüküm masü ajemalu, sempatsü melena temeim mapa inyakba, itemjagi lokti tejakeni anir. Nukjidong tajung yur, tenla ki sabang (pulpit) nungi dang masü (when the regular gatherings are temporarily suspended), saka tanü social media platform balala nung debate tajung akar aser iba sabang nung o-lemsatepba ajanga tanü alima tongpang tulujia kokteta bener otetsu! Iba nung nung telongjem, ochishi mulungsentsu, teyimlatep aser temeim mapa sayuteptsüla ta angateter.

Lokti teyanglushiba nung mapa küma inyakbaren

Covid-19 wara mapang aser iba sülen asenok teinyaktsü mapa aika angur aser lenmangtema sadema lir. Lokti temelenshi indang lenmang aisu nung akaba rongnung, ishika tuyutsü tenüngdaktsü. Tangari ngudaktsütsü osang prokshibaji masü (not show-off news and activities), saka temelenshi aruyimji mapa tila kar inyakba ajanga tenzükali. Nisung ka dang-a ajangzukba mapajia kanga tongtipang. Ano, taka-taiteribo mapa tulu atemzuka inyaktu akok, rongsen tenlaba ajanga. Tangar dak temeim mapa agi tangshia inyaktu senti mapangji tang ya lir. Lenmang pungusü nung bilemdangdi:

i. Sayutsungiba ama mapa küma inyakba (practicing what we preach)

Asenok tamangertemi laishiba nung sayutsungiba den külemi mapa küma inyaktsuba indang tesayuba jungjunga shia angur. Osangtajung Mathi 23:1-12 nungji Yisui tezülurtem aser Farisitem aitsüba shia angur. Yihuda nunger lenirtem jagi Mosa ozüng nung kechi shia ali item ajakji kanga junga metet, saka mapa maka! Idangji, Yisui parnok aitsu "kechiaser parnoki jembir, saka meinyaker" (v.3). Tanua kesaji Naga lima nung arogo aser lokti kari langpang nungibo kotaki tangsa ayipa atutsu amai sayutsungir! Ajida asüyonga, mapa mekara tamang kisungji tasü den saku (Yakob 2:14-26). Sura, itemji anemsübapurtem asütsü. Khrista sülen anidaker asoshi ya tongtipang - Mathi kaket nung zulu aliba ama Yisu ji asen tatishitsü kümdaktsür, Pa sülen anitakdi. Asenoki jembiba aser inyakba jagi asen tamang jagi sayutettsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Archaeologist temi Noah'er rong mesükba 'formation' ka angu



October 03, 2021: Tawa archaeologist temi anüdoklen Turkey nung Laishiba nung shia aliba Noah'er rong mesükba 'formation' ka ngutetogo.

Noah's Ark Scans project inyaker archaeologist temi ground-penetrating radar (GPR) amshia Durupinar nung rong mesükba tesemji bushisüngdangdar.

Iba project lenir, Andrew Jones-i, iba rongji Laishiba nung shia aliba Noah'er rong den kasa aser Laishiba nung rong indang shia aliba ajakji den puteper, ta metetdaksü.

Osangbener den jembidang Jones-i, "Iba tesem nung alibaji

longtem ka mesüra lishi-tzü ayimba ajanga kümtetba dangbo masü. Ajisüaka iba ya Laishiba nung nisungi yangluba Naoh'er rong den kasa lir," ta metetdaksü.

Rong mesüka aliba tesemji Laishiba nung shia aliba Noah'er rong metong tasazük metre 150 mesüra Lai nung shia aliba cubit 300 shi lir.

Doubting Thomas Research Foundation nung Tir, Ryan Mauro-ia, tang tasen bushitetba ya Laishiba nung shia aliba rong asütsüa akok, ta metetdaksü.

Rong mesükba 'formation' ji Mount Tendürek nung lir aser iba tesem ya Ararat

tenem anasa lir. Lipok 8:4 nung Noah'er rong tesüsa Ararat tenem nung anenzük, ta shia lir.

Noah's Ark Scans website ajanga ashiba agi, Durupinar site ya mezüing 1959 küm Turkish Army Captain Ilhan Durupinar-i nguteta liasü aser 1970s nungi 1990s mapang tashi nung research agirtemi kanga sapua iba tesem nung bushisüngdanga mapa inyaka liasü.

2021 küm Turkey nunger scientist tem, America nunger aser tangartemi scientific method tasen aika amshia iba tesem nung bushisüngdang tenzükogo.

Karnataka nung anti-conversion ozüing kübok Khristan 6 apu

October 03, 2021: Tesüiba anogo 12 tsüingda Karnataka nung anti-conversion ozüing kübok Hindu nungertemi Khristan trok nem tai tongloktsüba sülen police station-i anir ao, ta International Christian Concern (ICC)-i metetdaksü.

Tawa Karnataka state nung BJP-i aniba sorkari state nung anti-conversion ozüing tasen ka benoktsü, ta sangdongogo.

September 26 nü anti conversion ozüing kübok Yadagiri District nung Khristan pezü apu.

Osangbener den jembidang Pastor Sanjay-i, Khristantemji Neehalli yimdak nungi kidangi aoba mapang nung police arua par pezüprong apu aser Gulbraga nung aliba Central Jail-i anir ao, ta metetdaksü.

ICC den jembidang pastor-i, "FIR nung parnok anema zülua alibaji tai ta parnoki police dang ashi. Iba ya tiyazü nung Khristantem anema tai tongloktsüba lir," ta metetdaksü.

Ano tanga tatalokba ka nung, Khristan apuani nati railway station ka nung tetsür ka nem Tasen Lai ka agütsüba nung ajemdaker India nung Tsüingrem mezüingmeshiba ozüing nung ajemdaker tena nem tai tonglokja ken o benok. September 20 nü Jogfalls

nung Pastor Anil Kumar aser pa kinüngtsü na oset ka abeni railway station-i ao. Station nungji tetsür ka den mapang tatsüka sensaksemba sülen lai mepishiba nung ajemdaker Pastor Kumar-i la nem Tasen Lai ka agütsü.

Iba mapang nungji Hindu yimsü alia amanger telok kati Pastor aser kinüngtsü na longbang, aser tenati Hindu nunger Khristan yimsü dangi meyipdaksür, ta tai tongloktsü.

Iba sülen Hindu nungertem jagi tetsürla dangji Pastor Kumar aser pa kinüngtsü na anema kuli agüjang ta akhang. Iba sülen Hindu nunger jagi apuani dak azükba sülen police ket nung agütsü.

Pastor Kumar bail nung chiokogo saka pa anema benoka aliba ken oji mapang talangka angadangtsüa akok. Iba tatalokba ajanga pastor-i pai ketdangtsüba house churches ajak shibangogo.

Karnataka state nung BJP-i aniba sorkari tekaraba nung anti conversion züing ka benoktsü, ta sangdongogo.

September 21 nü Karnataka Home Minister, Araga Jnanendra-i, "State nung kangshia tamngba yimsü meyipdaksütsü menüingdak. Mesüzüka yimsü meyipdaksütsüba ozüing alema lir, ibayongji ozüing alema

inyakertem aputsü atema ni police dang tuyuogo," ta metetdakja liasü.

Ano Karnataka nung BJP MLA, Goolihatti Shekar-ia, Chitradurga nung Hindu nunger 20,000 shi Khristan yimsü dangi meyipogo, ta metetdaksü.

Shekar-i, Hosadurga Assembly constituency nung Khristan missionary temi Hindu nunger Khristan yimsü dangi meyipdaksür, anungji parnok anema inyakttsüla, ta takhangba agütsüba sülen state nung BJP-i aniba sorkari anti-conversion ozüing benoktsü lemtet.

Shekhar-isa, "Kütsü-a mesüzüka Khristan yimsü dangi meyipdaksüogo. Khristan missionary temi kütsü Khristan yimsü dangi meyipdaksü aser la dang tenütsü nung 'kumkum' teinok ta tuyu," ta metetdaksü.

"Kütsü phone nung ring tone-a Khristan sarasadem kati melenogo. Joko onoki kidang 'puja' junga magiteter. Onoki la dang langka kar danga shira lai la soseta asütsü ta ashir. Region nung Khristan missionary temi Khristan yimsü proker aser parnoki sarasadem agütsü atema kütsü jaoka liasü. Tangbo lai kidang Hindu nunger Tsüingremtem noksa alibaa maginer," ta pai metetdakja liasü.

ANO GO ABEN TSÜNGREM DEN

Kibubai azüokba metetang

"Ajiang, Tsüingremi shiba arütsür iba nisung tepelatsü; anungji ajak Takoksangi merenshiba mezüingmeshi tesü;"

Nisung shibai adianui mesüra külem medemertemi merenshia metongshitsüba mezüingmeshi asür, ibala taküm dangji tamachi mesüra sowar ta ajatsü tetemsü.

Uz lima alisang Yob, shiba takar nisung ka liasü, pa ya kanga dang tetemjen aser teindang, shibai Tsüingrem tsübu aser tamajung sempa pa arja merenshitsü atema Tsüingremi satan dang melaba angur.

Satani Yob kanga sashia merenshi, pa jabaso/jala aser takaba ajak meshi-meshia samatsü, ano pa süngjem-süngjema melitetsüsa temang ajunga zükbanga koma adokdaksü; saka pai takümba magitet kechiaser takümjibo Tsüingrem nungi lir.

Iba ama tia ka nung aliba mapang Yob medemer Teman nungba Elifazi Yob mesüzüka pa metenja jembidang "Tsüingremi shiba arütsür iba nisung tepelatsü, kechiaser pai ayako tendaktsür aser Paisa aneptsür, Pai yirutsür aser Pa teka agisa aneptsür" (Tekong 18) ta ashiba angur.

Temeim amangbapurtem, mapang aben tsüingremi asenok Pa tsütsü tsüingchi taküm ka kümdaktsütsü atema teküboktiba jenjang tashia na aser ni bener alutsü akok, saka ibaji asenok metongshitsür ta aseni agizüktetra; ibaji takokba tamang.

Sarasadem

Temeim Tsüingrem, Nai metongshia arütsüdang ibaji agizüktettsüsa kü nem tangatetba tashi kua. Amen

Kentenba tour ka nung nisung 2,100-i Khrista agizük

October 03, 2021: Alabama nung sayutsüingir, Nick Hall aser osangtajung kentenertem- Chris Tomlin, Kari Jobe aser Bethel Music nunger kenten sentong tour ka nung nisung 2,167-i Khrista agizük aser iba osangji Pulse Ministry tentetsang, Nick Hall-i lemsatepa liasü.

Kentenba tour ji August 13 nungi August 23 tashi agia liasü.

"Iba tour nung shilem agiba ajanga nisung aika den osangtajung lemsateptsü atema ni maongka ngua liasü, aser iba ya sayatenya mapa lir," ta pai metetdaksü.

Instagram ajanga Hall-isa lanur kati Khrista nem pa taküm bendanga agütsüba lemsatep.

"Tanü ni sayutsüingiba sülen sabang tesülen ni Jesse ajuru. Tawa tetsü asü aser pa Tsüingrem den tesendaktep raksar liasü ta pai ashi. Künati tamang indang o lemteper aser pai kü dang tongti

tasüingdangba kar asüingdanga liasü," ta Hall-i metetdaksü.

"Pai kü dang pa kodaki aotsüsa shilem 70 maongka lir ta ashi, anungji ni pa dang nai tekümtet tejangja nguner asü ta asüingdang. Pai hau, ta ashi aser pai pa taküm Khrista nem bendanga agütsü," ta Hall-isa metetdaksü.

Hall-isa, chichiba ministry ji sabang nungi masü saka tanga nung ataloker, ta ashi.

"Sayutsüingir aikati sabang nungi jembiner, ajisüaka na aliba tesem mashie ka nungi nai Yisu indang lemsateptsüla," ta pai ashi.

Tawa Hall leniba nung evangelist training program "Pulse 100" agia liasü. Iba program ayongzuka agiba nükjidongji osangtajung lemsateptsü atema sayutsüingir 100 nem training junga agütsütsü asoshi liasü.

Sangküm Hall leniba nung Dallas nung "Together '22" sentong agütsü.

Mamata Banerjee-i Bhabanipur by election nung takok nguogo



Kolkata, October 03, 2021: West Bengal Chief Minister, Mamata Banerjee-i Bhabanipur by election nung takok anguba sülen Kolkata nung Trinamool Congress nung inyakertem benjungtepba noksa nung angur.

Kolkata/Berhampore, October 03 (Agencies): West Bengal Chief Minister, Mamata Banerjee-i Bhabanipur assembly by election nung BJP candidate, Priyanka Tibrewal madak vote tali 58,832 agi takok nguogo; Amongnü votes round 21 ben zünga liasü.

Trinamool Congress (TMC) tongti lenir, Mamata Banerjee-i vote 84,709 angu, BJP candidate Priyanka Tibrewal-i vote 26,320 angu aser CPI(M) nungi Srijob Biswas-i vote 4,201 dang angu.

Takok anguba sülen osangbenertem den jembidang Mamata-i, "Onoki ward shia nung takok nguogo. Ni kanga melung asür, kechiyong Bhabanipur-i lenmang sayuogo. Ajaki iba menden nung rangloka liasü. Ni tali asentenshir nüburttem tenzüksü," ta

metetdaksü.

Laisa, "Ni V sign (takok anguba temaitsü) mesayutsü. Ni temeyong asem dang sayutsü, kechiyong ni kü kija toktep masü saka külem tenzükertemia Jangipur aser Samshergunj na nung takok ngudar," ta metetdaksü.

Samserganj, Jangipur aser Bhabanipur mendentem nung September 30 nü by election agia liasü. Amongnü vote tezüngdak mapang nung Mamata aser TMC pusemertem lenmang nung adenshia benjungtep tenzüka liasü saka yimti nung BJP aser CPI (M) office tembo kanga azüngmeyaka liasü.

Ano külen Election Commission-i shidi ka ajanga state Chief Secretary dang election sülen lendong matalaoktsü atema lokti

adenshia benjungtepba nokdangang, ta tuyua liasü.

Honibar aonung BJP candidate, Priyanka Tibrewal-ia shidi ka ajanga Acting Chief Justice of Calcutta High Court Rajesh Bindal dang, election osang sangdongba sülen rara madoktsü atema police dang tuyuang ta mepishia liasü.

September 30 nü Odisha nunga Pipli menden atema by election agiogo.

Taküm April ita nung Nandigram menden nung Mamata Banerjee-i BJP candidate, Suvendu Adhikari matsüngdang tamakok ngua liasü.

Bhabanipur assembly menden nung West Bengal Agriculture Minister Sobhandeb Chattopadhyay-i takok ngua liasü aser iba menden nungi Mamata toktepdaksütsü atema pai iba menden azüngtetja liasü.

India aser Germany nati Afghanistan atema amalitepa inyaktsü

New Delhi, October 03 (Agencies): India aser Germany napronglai Afghanistan tensa atema tebilemtsü katsür aser linük anati iba dak sendakba onüktem atema amalitepa inyaktsü, ta Amongnü German ambassador to India, Walter J Lindner-i metetdaksü.

"India ya yangji (Afghanistan) tongti shilem agir ka lir aser terenlok projects aika inyakdar, aser tesüiba küm 20 tashi Germany-ia yangji yakyaka inyaker. Anungji linük anaprong tangatetba kanga

mesükteper," ta sentong ka nung jembidang Lindner-i metetdaksü.

German reunification sülen küm 31 ajungbamong nung pai Paharganj nung aliba Sheila Theatre nung painting ka semzükja liasü.

Lindner-i, India aser Germany napronglai Afghanistan nung taoba sorkar nungita liasü aser iba linük nungji, talisa tetsürtem atema tensa tajungba akümtsü atema varia liasü, ta ashi.

"Taliban teloki kanga kera inyakba ajanga asenok ajak

süngmanger. Iba tensa atema asenok ajaki inyaktsüla. Asenoki Taliban den jembia iba linük nungjagi nisungtem anitetsüla. UN ajanga asenoki Afghanistan nung tensa tamajungba nokdangtsüla," ta paisa metetdaksü.

German ketdangserisa, India-Germany partnership atema rongsenkettsüng, tzü-mopung kümzükba, green energy, kaketshirtem exchange sentongtem, science & technology aser artificial intelligence sector temji kanga tongtibang asütsü, ta metetdaksü.



October 03, 2021 nü Bhopal nung aliba BJP headquarters nung taoba mapang Congress MLA aser Jobat Assembly by-election nung candidate, Sulochana Rawat-i BJP nung adenba sülen tangokba noksa nung angur. Kasa noksa nung Madhya Pradesh Chief Minister, Shivraj Singh Chouhan aser BJP State Tir, VD Sharma nata angur.

China nunger Ladakh aser Uttarakhand telungi aiter: Rahul

New Delhi, October 03 (Agencies): China nunger sepaitem Ladakh aser Uttarakhand telungi aitar, ta metetdakja Amongnü Congress lenir, Rahul Gandhi-i Centre aitsüogo.

Paisa, 2014 küm election mapang nung Ato kilonser, Narendra Modi-i pa teku tasazük inch 56 lir ta jembiba o aitsü.

Ladakh nung China sepaitemi ambangyima inyakba atema mapang shia Rahul Gandhi-i Modi aser Centre sorkar aija arudar.

"China aser Pakistan, iba denji 'Mr 56 inch' (Modi) senteper China nungeri India nunger li atsünga agir," ta Rahul-i Hindi oshi nung tweet ka ajanga metetdaksü.

August 30 nü China nunger sepai People's Liberation Army (PLA) aika Uttarakhand kübok Barahoti sector nung aliba Line

of Actual Control (LAC) adena aita liasü, saka ghonda ishika dang lirbo parnok meyipa ao, ta osang angazüker.

Tawa India aser China sepaitem napronglai eastern Ladakh kübok tongtibang tesem ana nungi ainshia liasü, ajisiüka China tsütsülen LAC nung kiojen aika yangludat.

Yaküm May ita nung Ladakh kübok Pangong awatsüing area nung linük ana sepaitem tsüingda raraba sülen tensa mejungi aküm, saka tongti ketdangsertem senden aiben mena aruba sülen tangbo tensa süngjemogo.

Taküm February ita nung linük anapronglai Pangong awatsüing tip anatsülen nungi sepaitem aser raraba hadirtem ainshia liasü. Tang Line of Actual Control (LAC) nung linük anapronglai sepai 50,000 nungi 60,000 shi tokja lir.



October 03, 2021 nü Patna nung RJD medical cell-i ayongzükba Doctor's Dialogue sentong nung Rashtriya Janata Dal (RJD) lenir, Tejashwi Yadav-i jembiba noksa nung angur.

Goa election nung TMC den Regional Party tasen anati shilem agitsü

Panaji/New Delhi, Mongputeni/October 03 (Agencies): Sangküm Goa Assembly elections nung party aikati shilem agitsüa akok; item party rongnung Trinamool Congress (TMC) den regional party tasen ana densema lir.

Kasa election nung tongti party temji BJP, opposition Congress, Arvind Kejriwal-i aniba AAP aser Shiv Sena party tem asütsü.

Mamata-i aniba Trinamool Congress aser regional party tasen ana- Revolutionary Goans aser Goencho Avaaz-ia Goa election nung candidate tem toktepdaksütsü, ta sangdongogo.

Kasa election nung Goa Forward Party (GFP) aser Maharashtrawadi Gomantak Party (MGP)-ia tokteptsü.

2012 küm nungi Goa nung BJP sorkar lir aser parnoki kümsük tasembenbuba atonga state yimsüsütsü nükjidong yur tokteptsü. BJP-ibo, iba election nung party aika toktepba ajanga party dang tajangzük angutsü, kechiyong ibaji ajanga opposition vote lemsatsü, ta bilemer.

TMC-ibo Goa election nung parnoki menden 40 prongla nungi tokteptsü, ta metetdaksüogo.

Tawa taoba mapang Goa nung Congress MLA, Luizinho Faleiro leniba nung party lenir

kari TMC nung denogo. MGP nungi taoba mapang MLA, Lavu Mamlakar-ia TMC nung denogo.

Tang Delhi nung sorkar aliba AAP-ia taruba Goa election nung shilem agitsü, ta sangdongogo. Taoba assembly election nungbo parnoki menden ka nunga takok menguteti liasü.

Ano külen state nung opposition Congress-ibo tanga party tem den lokteper tokteptsü atema jembidar, ta osang angazüker.

Tawa osangbenertem den jembidang Goa Pradesh Congress Committee Tir, Girish Chodankar-i,

"Tanga party den lokteptsüji kü melung masü. Iba atemaji party nung bangdak lenirtemi dang telemtetba agitsü," ta metetdakja liasü.

2017 küm Goa election nung Congress-i menden 17 angu aser BJP-i menden 13 dang angu saka BJP-i tanga regional party tem den lokteper sorkar aküm. Tangbo Congress MLA 4 dang lir.

Taruba Goa election atema Chief Minister Pramod Sawant leniba nung BJP-i nüboyimtsü aser party election in-charge atema taoba mapang Maharashtra chief minister Devendra Fadnavis shimmer election atema maparen tenzükogo.



Mexico City nung 1968 kum Tlatelolco kaketshirtem tepsetba bilemteta jajaba mapang tetsür kati Mexico nisan amer aoba noksa nung angur. Mitkartem aser police temi kaketshir aser civilian tem tepsetba bilemteta Mexico nung Deobarnü iba anogomung mungogo.

Italy nunger rong kati Libya nungi ajener nisung 65 kumzük

Rome, Mongputeni/October 3 (Agencies): Italy indang offshore supply rong kati Honibarnü tanur aser tetsür densema Libya nungi Europe-i jena arurtem sung agi yangluba rong ka nung mener lia kumzükogo.

Item nisungtem mena aliba rong ya engine raksaba sülen tzü nung apongshishia lia Mediterranean nung yimzüba NGO monitoring aircraft Seabird-i angu. Iba rong nung mena alirtem life vests semer liasü aser Seabird-i mepeshiba sülen Buri oilfield anasa Asso 29 supply rong yagi international tzüyim nung parnok kumzük. Seabird nung mener aliba Associated Press osangbener kati item nisungtem kumzükba

ngugogo. Item nisungtem kumzükba sülen mapang tatsüka lir Libyan coast guard rong ka arua rong tazüing asadanga liasü. Linük toktsür aoertem kumzükba sülen yimya agi Libya nunger ketdangsürtemi arua rong indang engines bener aoer.

Asso 29 rong nungi sangdong ka ajanga, tanur pongu densema rong nung mena alirtem ajak kumzükogo aser parnok ajak tema anema lir ta metetdaksü. Seabird den radio ajanga tongtepratepba mapang captain-i ashiba agi, parnoki kumzükba nisungtem tekumzükba tesem ka bushia anir aotsü atema Rome nung amenoker aliba rescue and coordination center nungi

tetuyuba atadar.

Tang tashi nung Tunisia aser Libya nungi central Mediterranean adena nisung 44,000 shi Europe tzüküm tonga aruogo. Parnok ya timba ka shibelenertemi rong tamajung nung mener belenshir. Item nisungtem ya tasadang ka shi Italy nunger meyong asetkong Lampedusa nung anenzükogo.

Nisung aika Europe tonga arutetaka aikati tamakok angur.

September 25 nü tashi nung EU-trained aser equipped Libyan coast guard temi nisung 25,000 dak tema pua linüki tanaben meyipa yokogo, ta U.N. migration agency sangdong ka ajanga metetdaksü.

Tanur raksaa indoktsü temeden atema US nung tetsürtem longkak ait

Washington, Mongputeni/Oct. 03 (Agencies): Tanur raksaa indoktsü atema tenokdangba tali agütsüba anema United States kübok yimti balala nung tetsür meyirijang aika longkak aita jaja.

Honibarnü US kübok tesem 660 shi nung longkak aitiba ya Washington DC nung aliba Supreme Court kima densema liasü aser ibai talisa Texas nung ozüing ka ajanga tanur dangloker hopta trok sülen raksa indoktsü nokdangba ajanga tenzük.

Iba ozüing ya taoba ita nungi amshir, koba linük nung tenokdangba tesashitiba ka lir.

Washington DC nung longkak aitertermi Supreme Court müketa yimtung nung "Kü temang, kü molung," ta ayimtena liasü.

Parnoki "Nü numenden kumzükua yuang", "Tanur raksaa indoker alir ni meimer" aser "Tanur raksaa indoktsü ya pei molung, aser ozüing ka masütsüla" ta zülua bener jaja.

Kari T-shirt nung "1973" ta zülua semer liasü, koba Roe v Wade telemtetba lir, aser iba ya ajanga kum aiba America tsüri tanur raksaa indoktsü mela liasü.

"Na kong lidir liaka, iba tensa ya kanga tammang lir," ta Planned Parenthood tir Alexis McGill Johnson-i Washington

DC nung Rally for Abortion Justice nung adener dang ashi.

Texas nung iba ozüing benokba sülen tetsürtem tanur raksaa indoktsü atema state aika ajanga aoba indang lai jembia liasü.

"Na kong lidir liaka, iba rara ya tang nü kishizüing nung lir. Tensa ya tammang lir, saka iba yongji asenok yangi lir," ta lai ashi.

Governor Greg Abbott ajanga meyongnem agütsüba "Heartbeat" ozüing yagi tanur hopta trok meta azülong nung temolungjang arakzüba jangjatetba sülen raksaa indoktsü tenokdangba agütsü. Ibai tetsür timbai la mashisa aliba memetetdang lir aser iba sülen ya shilem 85 nungi 90 tsüingtai tanur raksa indoker, ta mongintemi ashir.

Iba ozüing yagi tashiyim amshia shi nung medemba sülen tanur abenba raksaa indoktsüa temelaba magütsür aser ozüing alema tanur raksaa indokba nung teyari agütsür tenüing tejangja agütsüba atema sen \$10,000 shi senpet agütsütsü shia lir.

"Kü temang nung kechi inyaknür aji inyaktsü atema tambur aser yimten yimsüsürtemi telemtetba agütsü menüingdak. Tetsür shiai pei mapang nung tanur agütsü atema temeden alitsüla," ta

Texas yimtiba, Austin nunger longkak aiter Alejandra Marquez-i ashi.

Tanur raksaa indoktsü temeden asoshi nokdaker aser US Justice Department ajanga Texas law ya state aser federal court tem nung jembitsü benoka lir, aser iba ozüing yagi Roe v Wade nung aibelener, ta ashir.

Justice Department ajanga iba ozüing ya khen atema nokdanga alitsü mepishiba nung ajemdaker Hokulbarnü Austin nung aliba federal court nung ken o jembia liasü.

Supreme Court indang kümsük tasenba tenzüktsü anogo an alia Honibarnü longkak ya aita liasü, kong Mississippi indang ken o balaka jembitsü lir, koba agi Roe v Wade case nung amenokba abortion temeden meyiptsütsü akok.

Court ajanga iba ozüing ya meyiptsüra tanur raksaa indokba ya Constitution küboki maittsü, anungji tenokdangba agütsütsü aser salatsü atema state tem nem temeden agütsütsü.

Texas law ya nokdangtsü atema abortion aser women's health provider temi ken o benokba September 1 nü magizük.

Taoba Tir Donald Trump kübok shimtetba obendanger temi high court nung tashi tuluba amshiteter.

Brazil nung Tir Bolsonaro anema longkak ait

Rio De Janeiro, Mongputeni/October 3 (Agencies): Brazil nung tir election agütsü kum ka lia Honibarnü Rio de Janeiro, Sao Paulo aser tanga yimti balala nung tir Jair Bolsonaro anema nisung meyirejang aikati longkak aitogo. Bolsonaro-i aniba sorkari wara achayangba dak sendakba nung temulung mesüi parnoki tir mapa nungi agütsü khanga liasü.

September 7 nü Bolsonaro pusema nüburttem adenshiba dang nungibo Honibarnü longkak aiterterm ishiba liasü. Iba longkak aitiba sentong ya taoba tir Luiz Incio Lula da Silvas Workers Party den sensaktepa aliba leftist party tem aser union movements kari ayongzükua liasü. 2022 kum October 2 nü Brazil tir election nung Bolsonaro den Da Silva-i tokteptsü imlar.

Longkak aitertermi tir-i COVID-19 wara azüoktsü atema jenjang tapet agia achayang masüba atema pa aitsü. Bolsonaro, shiba vaccine-a magi aser yimya agi mask-a masemer, pai tashidak süoki ia magir aser wara pokteter aliba mapang lokti senden tulu ayongzükua sentong balala agir. Brazil nung nütsüing yongsük million 212 aliba rongnungi corona tashidak agi

nisung 597,000 shi süogo. Longkak aitertermisa, chiyongtsü aser electricity amala nung jenjang ajungketba anema nokdaka liasü.

"Linük nung health aser education raksaba ngua kanga mepelar aser linük nung ya tzürar aika lir," ta arishi kum 75 tain Marilena Magnano-i Associated Press dang ashi. Onoki Bolsonaro sorkar nungi tugudaktsüner; pa mapa süitemogo, ta paisa ashi.

Kum tsüingda presidents approval ratings tanem tanemi tajemba küma odar, saka taoba mapang mapa nungi aginba tir tem dang nungi pa kanga agi nungtuguba lir. Tir tem rongnung tesüsa 2016 kum Workers Party nungi Dilma Rousseff mapa nungi agina liasü.

Bolsonaros lenisüba nung linük yimsü asü tenzükba sülen pa mapa nungi agütsü takhangba shiti 130 dak tema benokogo, saka lower houses speaker, Arthur Lira aser pa jakdang alirtemi item takhangbatem benoka asadangtsü magizüki laisü. Ken o asdangertemi, opposition yongtsü nung mangatetep aliba ajanga Bolsonaro's tir mapa nungi agütsü atema ken o benoktsü asoshi Lira menongshitetsü, ta ashi.

Qatar legislative election tembangogo, tetsür kata meshimtet

Doha, Mongputeni/Oct. 03 (Agencies): Qatar indang mezüingbuba legislative council election osang sangdongogo, saka tetsür candidate 26 nungi katia takok mangu.

Gulf Arab linük indang mezüingbuba election ya advisory Shura Council shilem asem sadanger shilem ana atema Honibarnü agia liasü.

Shura Council dak legislative tashi lir aser parnoki arok sentongtem aser budget agizüker, saka defence, security, economic aser investment policy atema parnok dak tashi mali. Iba takar linük nungya political party tem tentetsü memelar.

Menden 45 aliba nungi züingsem 30 atema election agiba nung vote agütsütsü temsüa alir shilem 63.5 ajanga vote agütsü, ta interior ministry ajanga Deobarnü sangdong ka nung ashi. Tanüingba council züingsem 15 ya emir ajanga maneni shimtettsü.

Iba election nung tokteper tetsür katia takok mangu, anungji Qatar yimtenren nung tetsür aser dangartem atema ola adoktsüpur candidate tem tezü atanger.

"Tebur kisüingi yimsü asütsü ya Qatar nükla ka masü," ta linük yimtiba, Doha nung

Markhiya district nungi toktepla arishi kum 59 tain nursing manager Aisha Haman al-Jasim-i ashi.

Lai Qatar nung tetsürtem dang parnoki amangba nung ola adoktsü aser tarutsü nung tetsür candidate tajung nem vote agütsütsü ajungshia liasü.

Tetsür candidate kari Qatar tsür bendanger den kibong kumer alirtem atema temelenshi ka arudaktsünü, kechiaser parnok chirtem nem Qatar senso magütsür.

Nüburttem tangatetba melenshidaktsütsü mechi arishi kum 34 tain industrial engineer Al-Maha Al-Majid-ia iba election nung toktepa liasü.

"Tetsür nem vote agütsütsü atema teburtem mesüzüktsü atema mapa tali inyaktsüsa akumer... Tetsürtemia kasa inyakteter ta iba lokti nem angatetdaksütsü atema mapa talila inyaktsü ni molunga lir," ta lai ashi.

Iba election nungya electoral inclusion aser senso indang kanga sashia jembia liasü.

Ozüing tesashi ka kübok 1930 masüandang nungi linük nung liyonga arurtem vote agütsütsü metemsü kumdaktsüba ajanga kin tulu kari ola adoka liasü.

Kangana-i ODOP indang brand ambassador inyaksü



Lucknow, Mongputeni/ October 03, 2021

(Agencies): Yogi Adityanath-i aniba Uttar Pradesh Sorkari State indang 'One District One Product' (ODOP) scheme atema brand ambassador inyaksü actress Kangana Ranaut shimogo.

Uttar Pradesh indang Additional Chief Secretary, Navneet Sehgal-i ashiba agi, Hokolbarnü film actress Kangana Ranaut-i Chief Minister Yogi Adityanath den ajuruteper aser pai Kangana nem ODOP product tem agütsüogo.

Yogi-i ashiba agi, Kangana-i iba ODOP scheme indang brand ambassador inyaksü.

Uttar Pradesh indang product aser craft (teka agi yangluba) tem, koba tanga tesem kecha nunga mangur,

item indigenous osettsüet ajungketsütsü aser alima dang sayutsü nukjidong nung, Yogi sorkari One District One Product (ODOP) scheme tenzükja liasü.

Ketdangsür sangdong ka ajanga angazükba agi, Yogi Adityanath iba scheme tenzükba ngua Kangana-i tenüngsang agütsü.

Yogi Adityanath-i kü nem 'coin' ka agütsü, koba Ram Temple indang bhumi puja nung amshir. Iba ya ni asoshi temoatsü ka ama lir, kechiyong ni 'Ayodhya' ta nungja agütsüba film ka yangludar," ta Instagram nung Kangana-i lemsatep.

"Taruba film - Tejas tangokba maparen nung Uttar Pradesh Sorkari amalitepa inyakba atema pelaba lemsateper aser aruya aliba

election nunga Chief Minister Yogi-i takok angutsü asoshi sarasademtsür. Uttar Pradesh nung tapasavi Raja - Shri Ram Chandra liasü aser tang asenok nem Yogi Aditya Nath moaja lir. Nübur ajungtsü asoshi nai maneni yimsü asütsü imlaa atar. Maharajji (Yogi)-i kü nem Ram Janm Bhumi Puja nung amshiba coin ka agütsüogo. Ni iba ya kodanga mamatetsü," ta lai lemsatep.

Maneni, acting tsütsü Kangana-i Tejas indang 'Moradabad schedule' tangokzükogo aser la Lucknow tonga aru. Instagram sabang nung fans dang lai Yogi Adityanath den ajuruteper aser sorkar indang ODOP programme atema la brand ambassador shimba osang lemsatepa liasü.

TENÜNGSANG AGÜTSÜR

Mr. and Mrs. Late Imrongzulu Longkumer (Changki) semchisemnurtemi promotion anguba atema tepelaba aser tetushi agütsür.

1. **Mr. Burwati Longkumer,**
Agriculture Department nung Joint Director promotion anguba.
2. **Ms. Temjenmongla Longkumer,**
Industries and Commerce Department nung Assistant Director/Functional Manager promotion anguba atema.

Onoki nena nem tenüngsang agütsür. Tsüngremi moajangma ta onoki sarasademer.

**Mr and Mrs. Late Imrongzulu Longkumer
Jasolong, Changki Village.**



Office of the

Wameken Senso Telongjem Tuli Town
P.O. Tuli, Pin-798618

TENÜNGSANG AGÜTSÜR

Langpangkong Tzükong-i yimli agüja Wb. Watitoshi (Wameken) Tzükong Mungdang (L.T.M) nung Tatong Tir jenjang ngutetba asoshi pa nem Wameken Senso Telongjem Tuli-i tenüngsang tulu agütsür. Tsüngremi pa taküm aser wadang moajangma.

**Sd/-
C. SUNEK JAMIR
President
Wameken Senso Telongjem
Tuli**

**Sd/-
Opang Lemtur
General Secretary
Wameken Senso Telongjem
Tuli**

Jay Dudhane aser Aditi Rajput nati 'MTV Splitsvilla 13' kokogo



Mumbai, Mongputeni/ October 03, 2021

(Agencies): Honibarnü, Jay Dudhane aser Aditi Rajput nati MTV Splitsvilla X3 kokogo. Aditi aser Jay nati iba title akoktsü asoshi Shivam Sharma aser Pallak Yadav na tsükdaktsü. Splitsvilla 13 sentong ya Sunny Leone aser Rannvijay Singha nati ketdangsüa agiogo.

Iba show tenzükür külen nungi terepranger ajaki Jay aser Aditi na sapua liasü aser tensa/ tayongzükba ajak nung tenati amalitepa inyaka liasü. Kasa show nung külem tetokteper tem ajangteta asaya asoshi tenati alakteta shilem tajung agiogo.

Osangbener den jembiba mapang, Aditi-i, künti iba show indang final episode külemi reprangtsü sentong renem, ta lemsatep.

Ajisüaka, iba takok asoshi lai maneni tepela nung benjunga liasü aser iba reality show nung Jay-i takok angutsü ta la dak

teimla tulu ayu.

Iba show nung, tesendaktep ka ayutsü asoshi jembiba mapang, Aditi-i, Jay künapronglai külemi longjema shilem agir takok angutsü bilema liasü, ta shisem.

"Küna tsüngda iba tesendaktep nung shilem agitsü asoshi lenmang bushidang, saka külemi mesüi kati iba maparen asoshi achaayangtsüsa aküm. Künaprongla tetemjen asütsü ta shimra, künti koktettsü ta tejbibiba ka ait," ta lai shisem.

Aditi-i ano Roadies aser tanga 'reality show' tem nung shilem agitsü tejangraba lemsatepogo. Laisa YouTube channel ka lapokogo aser temeimertemi la nungitta yariba indang lai pelashishia lemsatepogo.

Iba reality show indang Host, Rannvijay Singha-i, season 8 tashi takok ngua agiba atema pelaba lemsatepa liasü.

"Season 13buba jangratema agiogo aser lenmang aisü nung asenoki tayongzükba jenti ajangshio, saka kibong ka

ama, asenok ajak longjemer iba sentong takok ngua tembangtsü asoshi meranga inyakogo. Shilem agir ajaki tejashi, parnok (couple) tsüngda temeim tesendaktep sayuogo aser couple ajaki pei dak aketba sempet tajungtiba amshia shilem tulu agiogo. Iba show tenzükür külen nungi tayongzükba ajak nung Jay aser Aditi napronglai kati ka metoktsüi amalitepa shilem agiogo aser iba tesendaktep takang ajanga tenati iba title abentsü maangka angu. Tenati iba season takok angutsü langa lir," ta Singha-i ashi.

Sunny Leone-i, "Mapang shia jembiba aruba ama, ni Splitsvilla kanga sapur, kechiyong iba show ajanga couple ka tsüngda tesendaktep aser temeim sayur. Küm nungi küm, iba show ajanga couple meimtepba, kati ka asoshi aria bilemstütsüba aser couple tsüngda tesendaktep sayua aruogo, saka tan season nung Silver aser Golden Villas nung asenoki temeimteper ana indang nguogo. Iba show nung, Jay aser Aditi nati temeim dak sendakba jakla ajak sayuogo aser show nung shilem agir rongnung tesendaktep tajung alir couple ji tena asütsü aser show tenzükür külen nungi ni tena kanga dang sapuadok. Tenati iba reality show takok anguba asoshi pelar," ta lemsatepa liasü.

Manisha Yadav alima nungi pilaogo



Mumbai, Mongputeni/ October 03, 2021

(Agencies): Television actress Manisha Yadav, shiba Zee TV indang nungtugu drama series Jodha Akbar nung Salima Begum shilem agiogo, Hokolbarnü la iba akümüli nungi pilaogo.

Osang ajanga angazükba agi, Manisha ya tekolok nung timtem (brain hemorrhage) adokba ajanga asü. Iba show nung la den külemi shilem agir (co-star) Paridhi Sharma-i Instagram sabang ajanga Manisha asüba osang lemsatepa liasü. Iba show nung Paridhi-i Jodha shilem agir.

"Iba osang kanga dang tejashitsüka na @manisha_Mann tesünep nung anisüngzükangma," ta Paridhi-i lemsatep.

Iba osang angashia, Paridhi-i, asür Manish-i toktsür aoba jabaso, shiba küm ka dang lir, pa asoshi kanga dang temolung shiranga bilemstür, ta ashi.

"Iba show temer sülen, la (Manisha) den mapang shia mejembitet. Ajisüaka, onoki Mughals' ta nungja agütsür

WhatsApp group ka lapoka lir aser actress ajak, shirnok iba show nung Begum liasü parnok iba group nung dena lir. Ajasünung, iba group nunganag onok tsüngda ola osang agitepa aser tongtibang osang kar lira ajaki iba group nung osangtem lemsatepa liasü. La asüba osang ya iba group nungang angazük aser ni kanga aoksa liasü," ta Paridhi-i ashi.

"Manisha ya kanga dang jeretperaba aser ajak den pelatepa jembiba nübu ka liasü. Iba show tangokba mapang onok ajak pelatepa kazüogo. La nem lemsatepa maparen ajak lai pelashishia agizüka aser aginüba ama inyakba ni yimdangi arur. La asüba osang angashia kanga dang jashiseter aser talisa lai toktsür aoba jabaso atema temolung shiranga bilemstür. Lai toktsür aoba adianu aser kinunger tem den mangyim jashi lemsateper," ta lai shisem.

Manisha'er jabaso ya taküm July ita küm ka jungogo aser Twitter ajanga, Manisha-i lar jabaso küm ka ajungba osang lemsatepa liasü.

Women's U-19: Sikkim-i Nagaland kokogo Quasar club-i tenüngsang agütsü



Dimapur, Mongputeni/October 3 (TYO): KIIT Cricket Stadium, Bhubaneswar nung Deobarnü U-19 women's asayamung nung Nagaland aser Sikkim na tsüngda asaya Sikkim-i run 52 agi kokogo.

Asaya nung Nagaland team-i toss akok aser mezüng field asütsü shim.

Bat asütsü maongka agütsüba sülen Sikkim team-i over 50 nung asayar 8 out ser run 143 yanglu.

Parnok rongnungi Nandita-i run 33, Pranita-i 32, Nur-i 16 aser Pretika-i run 15 yanglua

liasi. Nagaland team atema Bipila-i wicket 3, Priyanka-i 2 aser Wataro, Soyimkumla aser Pausamyile nungeri wicket kaka agia liasi.

Asaya tanabuba shilem nung Nagaland team batting amenba mapang parnok over 38.3 nung run 91 dang yanglur asayar ajak out süa asaya makok.

Nagaland team nungi Iluneule Zeliang (W)-i run 25, Priyanka-i 19 aser Wataro-i run 13 yanglu.

Sikkim bowler tem

rongnungi Diksha-i wicket 3 aser Nur o Leeza nati wicket anana agia liasi.

Nagaland tetsür U-19 team tatemangbuba asaya October 4 nü Manipur den Railway Stadium, Bhubaneswar nung asayatsü.

Kasa mapang nung Nagaland U-19 tebur team-a October 4 nü Arunachal den MECON Stadium, Ranchi nung asayatsü lir, ta Nagaland Cricket Association Hon. Secretary, Hyunilo Anilo Khing-i sangdong ka ajanga metetdaksü.

Kohima, Mongputeni/October 3 (TYO): Quasar club, Kohima-i, tawa tembangba Open Nagaland Ping Pong Championship 2021 nung shilem agiba club züngsemtem ajak nem tenüngsang agütsüogo. Iba asayamung ya Northeast India Academy of Performing Arts (NIAPA)-i ayongzüka asayaogo.

Club-isa, club nungi volunteer, umpire aser asaya ketdangsurtem aser final tonga asayartem nem tenüngsang agütsü.

Iba asayamung nung club nungi tebur kija asaya nung Seyievilie Seyie-i final tonga asaya aser iba den ano tebur

tarep final asaya nung Kevirilie Dzüvichü, Kevichatuo Liezietsu aser Vikuo Metha nungeri final tongtet aser tarep temeyoktep asaya nung Meyinukshi Longkumer aser Limasanen Jamir natia final tongteta asayaba atema club-i parnok ajak nem tenüngsang agütsü.

Maneni Quasar club-i, Table Tennis tournament tajung ka ayongzüka asayaba atema NIAPA dang kanga pelaba lemsatop. Parnokisa iba asayamung ayongzüka asayatsü atema tongpu apur inyakba atema team aser Department of Youth Resources and Sports dang kanga pelaba lemsatopa liasi.

National coaching camp atema hockey squad sangdongogo



New Delhi, Mongputeni/October 02, 2021 (Agencies): Tokyo Olympics, kong otsüsüsüsä India tebur hockey team-i bronze medal anguba den küm 41 tashi ata arur Indian hockey team mangdang atalokba sülen, Paris 2024 atema India tebur hockey team maparen tenzüksü aser iba Olympics atema tajungtiba renemtsü sentong lir.

Senior's Men National Coaching Camp atema Honibarnü, Hockey India-i züngsem 30 agi kümetba squad ka sangdongogo. Iba coaching camp ya Hombarnü (03.10.2021) Sports Authority of India (SAI), Bengaluru nung tenzüksü.

Aruya aliba national camp sentong dak sendakba nung, Chief Coach Graham Reid-i, "Asayartem (India tebur hockey squad) mapang talangka anisüngzüker sülen iba camp nung adentsü renemdar. Iba national camp nung adentsü atema parnokiyongyasetalitsü aser tarutsü nunga takok angutsü asoshi parnokitanaben temulung agüja iba camp nung shilem agitsü imlar.

"Olympics nung asaya yimyatem asadangshiba den asayar aser team ka ama tajangshiba dak ajemdaker iba camp agitsü," ta Reid-i shisem. Tang, asayartemi Tokyo

Games nung takok anguba khen amadoktsüla aser 2022 küm asayamung balala atema asentenshir renemshitsü tenzüksüla, ta pai ashi.

"Olympic nung shilem agia takok tajung ajangshibaji kanga dang tulu, saka 2022 atema asayartem parnok tebilemba aser temang anepaluba tsütsü renemshia lidaktsüner, kechiyong sangküm February nung FIH Hockey Pro League nungi tenzüka tongtibang asayamung kar asayatsü lir. Iba camp nung team telongjem aser asaya atema tajungtiba renemtsü asoshi rangloker maparen achaayangtsü," ta Reid-i ashi.

National Camp atema tebur hockey squad:- PR Sreejesh, Krishan Bahadur Pathak, Suraj Karkera, Harmanpreet Singh, Dilpreet Singh, Surender Kumar, Gurinder Singh, Amit Rohidas, Manpreet Singh, Hardik Singh, Nilakanta Sharma, Vivek Sagar Prasad, Simranjeet Singh, Akashdeep Singh, Mandeep Singh, Lalit Kumar Upadhyay, Gursahibjit Singh, Shamsher Singh, Varun Kumar, Jarmanpreet Singh, Dipsan Tirkey, Nilam Sanjeep Xess, Jaskaran Singh, Rajkumar Pal, Gurjant Singh, Sumit, Shilanand Lakra, Suman Beck, Mandeep Mor, Ashis Kumar Topno.

ISSF Junior World Championship nung India temaba jenjang nung lir

Lima, Mongputeni/October 3 (Agencies): ISSF Junior World Championship nung Deobarnü India team-i gold medal pezü aser silver medal ang ngua team tem rongnung parnok temaba jenjang nung lir.

India team-i 10m air pistol medal events ajunga akok, kong tarep temeyoktep, tetsür aser tebur team tetoktepa densema lir aser iba den tebur 10m air rifle asaya nunga gold medal ngua Deobarnü tashi nung India team-i gold medal trok, silver trok aser bronze medal ana nguteta lir.

India sülen tanabuba jenjang nung USA lir, Parnoki gold pezü, silver pezü aser bronze ana ngua lir.

Deobarnü India nunger asayartem ajak rongnungi Bhaker-i tajungba asayaa lai gold medal ana nguogo. Lai iba asayamung nung tang tashi nung gold medal asem ngua lir. Pistol Mixed Team asaya

nung Sarabjot Singh den longjemer gold anguba sülen lai 10m air pistol women's team event nung Rhythm Sangwan aser Shikha Narwal na den longjemer Belarus team 16-12 agi koka gold medal angu.

Tebur air pistol team nung Naveen, Sarabjot Singh aser Shiva Narwal nungeri final asaya nung Belarus tebur team 16-14 agi koka gold medal angu.

Deobarnüsa junior men's 10m Air Rifle team-ia goal medal ka nguogo.

Tetsür 10m air pistol team asaya nung India-i asaya amokbanger asaya kechiyong parnok qualification mezüngbuba round nung 180 shots sülen point 1722 angu aser tanabuba round nung 569 ngua liasi.

Final asayabo kanga toktepa tenzüka ajisüka India team-i tajungba asayateta asaya akok. Tebur 10m air pistol team

asaya nunga India team-i mezüngbuba aser tanabuba round naprongla akok aser iba sülen final nung kanga toktepa asaya parnok Belarus team akok.

Tetsür 10m air rifle team asaya nung India tesürtem rongnungi Nisha Kanwar, Zeena Khitta aser Atmika Gupta nungeri qualification mezüngbuba round bo akok saka tanabuba round nungbo parnok Hungary team sülen tanabuba jenjang nung liasi.

Hungary team nungi Eszter Mezaros, Eszter Denes aser Lea Horvath nungeri final round nunga kanga junga asaya aser parnok gold medal akok.

Atmika-ia Deobarnü silver medal ana nguogo. Lai 10m air rifle tarep temeyoktep asaya nunga Rajpreet Singh den silver medal angu.

Kasa mapangnung Rajpreet-ia gold ka aser silver medal ka ta ngua lir.

EPL: Watford-i manager Xisco Munoz mapa nungi anentsü

London, Mongputeni/October 3 (TYO): Watford-i Deobarnü parnok indang coach Xisco Munoz mapa nungi anentsüba osang sangdongogo. Premier League season kanga mejungi tenzüka sülen Xisco mapa nungi anentsü.

Watford pur tang Premier League table nung jenjang 14buba nung aliba mapang pai club toktsüogo. Parnoki tang

tashi nung asaya tenet nung point tenet dang nguteta lir.

"Team asaya tajungba küma aoba meteta akümtsüba mapang ka nung tawa sayaba yimya meshidak ta board-i bilemer," ta club sangdong ajanga metetdaksü.

Munoz-i iba club nung coach mapa December ita agizük aser toba season Championship nung tanabuba jenjang tonga team aniba

sülen iba club top flight-i anir atu.

Club sangdong ajanga ashiba agi, "taoba season nung club top flight-i aitsüsa asayaba nung Xisco-i shilem agiba Hornets puri kodanga mamatoktsü aser pa tarutsü tajungba ka asoshi imlaja atar."

"Head coach tasen ka mesangdong tashi club-i osang kecha magütsütsü," ta kasa sangdong ajanga metetdaksü.

BILEM DANGANG

"Tangar kar peladoktsüsüsä nü dak tashi lira inyangang."